



Broj: 02-04-2-1762/24
Maglaj, 28.11.2024. godine

Z A P I S N I K

sa konstituirajuće sjednice Općinskog vijeća Maglaj
održane dana 28.11.2024. godine u 09:00 sati u Sali Općinskog vijeća
JU Dom kulture «Edhem Mulabdić» Maglaj

Predsjedavajuća Aida Bašić: Na osnovu člana 23. Statuta Općine Maglaj i člana 14. stav 2. Poslovnika o radu Općinskog vijeća Maglaj otvaram konstituirajuću sjednicu Općinskog vijeća Maglaj.

Na današnju sjednicu pozvani su svi vijećnici koji su na Lokalnim izborima 2024. godine osvojili vijećnički mandat i koji su u tom smislu od strane Centralne izborne komisije Bosne i Hercegovine dobili certifikat.

Takođe, na današnju sjednicu koja ima i svečani karakter, pozvani su predstavnici Javnih ustanova i Javnih preduzeća čiji je osnivač Općina Maglaj, predstavnici OSCE Maglaj, predstavnici političkih stranaka koje učestvuju u općinskom vijeću, kao i predstavnici vjerskog života.

Pozvan je naravno i Općinski načelnik, Općinska pravobraniteljica, rukovodioci općinskih službi, kao i zastupnici u Skupštini Zeničko – dobojskog kantona Emira Drnda-Čičeklić, Jasminko Kapić i Hajrudin Ferić. Molim Eminu Hasanić, predstavnicu Službe Općinskog načelnika i Općinskog vijeća da prozivkom utvrdimo broj vijećnika prisutnih na konstituirajućoj sjednici Općinskog vijeća Maglaj. Konstatujem da današnjoj sjednici prisustvuje 25 vijećnika i da su svi prozvani vijećnici verifikovani, izabrani u Općinsko vijeće Maglaj i kao takvi potvrđeni od strane Centralne izborne komisije. Dana 14.11.2024. godine od CIK-a smo dobili Obavijest i Uvjerenja o dodjeli mandata, koje su vijećnici i preuzeli, te ispunili svoju obaveznu potpisivanjem Uvjerenja o dodjeli mandata i Izjave o prihvatanju mandata. Niko od vijećnika se nije izjasnio da odbija mandat.

Ispred svakog vijećnika na stolu nalazi se Poslovnik o radu Općinskog vijeća Maglaj i Etički kodeks za izabrane zvaničnike općine Maglaj, a Statut Općine Maglaj, koji će vam zasigurno trebati u budućem radu, a koji možete naći na web stranici Općine Maglaj.

Pozivam novoizabrane vijećnike da daju svečanu izjavu, te vas molim da svi ustanete.

Gospođa Hasanić će čitati izjavu a vijećnici će ponavljati za njom. Takođe bih vas zamolila da svečanu izjavu potpišete i dostavite gospođi Hasanić.

Emina Hasanić: Ja, obavezujem se da ću povjerenu dužnost vijećnika obavljati savjesno i odgovorno, da ću se pridržavati Ustava, zakona, Statuta Općine Maglaj i drugih akata ovog Općinskog vijeća. Da ću se zalagati za zaštitu i unaprjeđenje ljudskih prava i sloboda, ravnopravnost naroda i građana i razvoj demokratije u najboljem javnom interesu svih građana općine Maglaj. Te da ću predano obavljati povjerene zadatke u cilju razvoja i napretka općine Maglaj, Zeničko-dobojskog kantona, Federacije Bosne i Hercegovine i države Bosne i Hercegovine. Čestitam svim novoizabranim vijećnicima i da vam zaželim sretan rad.

Predsjedavajuća Aida Bašić: Pozvala bih sve vijećnike prisutne u Sali da odamo dužnu počast onima koji su svoje živote ugradili u zemlju domovinu nam Bosnu i Hercegovinu i svim žrtvama rata. U skladu sa Poslovnikom o radu Općinskog vijeća prvi korak u radu jeste formiranje Komisije za izbor i imenovanje, što je i preduslov za nastavak rada. Prije nego što pozovem

političke partije da daju svoje prijedloge održat ćemo kratki sastanak radi konsultacije sa predstavnicima političkih partija vezano za članove ove Komisije. Evo molim predstavnike političkih partija samo kratka pauza od 5 minuta. Nakon kratke pauze i konsultacija sa predstavnicima političkih partija sada bih pozvala predstavnike političkih stranaka da daju svoje prijedloge za sastav Komisije. Otvaram raspravu. Vijećnik Adis Abdurahmanović.

Vijećnik Adis Abdurahmanović: Selam alejkum i dobro jutro. Evo prije svega iskoristio bih priliku u svoje lično ime i ime svoje političke partije da čestitam novoizabranom načelniku i da mu poželim sreću u narednom periodu. Također u svoje lično ime i u ime svoje političke partije čestitam svim vijećnicima na osvojenim mandatima. Želim da poželim da budemo produktivni i da radimo u interesu naših građana i naše zajednice. Što se tiče tačke Dnevnog reda, ispred koaličione većine, koalicionog bloka predlažem članove za Komisiju za izbor i imenovanja, predsjednik Komisije da bude Eldis Kusur, njegov zamjenik gospodin Nesib Serhatlić, član Mustafa Mehmedović i Mirza Mešić. To su četiri imena. Za peto ime ostavljamo prostora kolegama iz Kluba vijećnika SDP-a da predlože iz svojih redova. Hvala. Naravno predlažem da glasamo u paketu.

Predsjedavajuća Aida Bašić: Hvala gospodin Abdurahmanović. Gospodin Firuz izvolite.

Vijećnik Firuz Galijašević: Pozdravljam sve prisutne. Isto tako želim čestitati načelniku na izboru, želim mu miran i sretan rad, naravno u skladu sa Statutom i zakonom. Čestitam isto tako i svim vijećnicima za novi mandat i vama isto želim miran rad. Što se tiče SDP-a i člana Komisije za izbor i imenovanje, mi predlažemo da naš član bude Senad Šehić.

Predsjedavajuća Aida Bašić: Hvala Firuze. Evo nakon što smo dobili prijedloge za sastav Komisije za izbor i imenovanje, ja ću još jednom pročitati koji su prijedlozi. Eldis Kusur za predsjednika, Nesib Serhatlić zamjenik predsjednika, Mustafa Mehmedović član, Mirza Mešić član i Senad Šehić član. Obzirom da smo se i usaglasili na pauzi vezano za sastav same Komisije, dat ću na glasanje ovako u paketu za svih 5 imena za članove Komisije za izbor i imenovanje. Ko je za ponuđeni prijedlog?

Glasalo za: Adis Abdurahmanović, Eldin Perhat, Maida Burajić, Eldis Kusur, Armina Mustabašić, Elmedin Ramić, Amer Musić, Alen Ridžal, Eldin Salatović (SDA), Firuz Galijašević, Senad Šehić, Damir Bašić, Jasmin Đuhara, Selver Mahmić, Arif Mujkanović, Adin Obralić, Eldin Mehinagić, Samir Fetić, Almin Smajlović (SDP), Aida Bašić (SNAGA NARODA), Nesib Serhatlić (PDA), Aida Hadžić, Mirza Mešić (DF, Mustafa Mehmedović (BH ZELEN), Kenan Burić (NAPRIJED).

Glasalo protiv: Nema.

Glasalo uzdržanih: Nema.

Konstatujem da je 25 vijećnika glasalo za, protiv i suzdržanih nema. Još jednom ću ponoviti. Komisija za izbor i imenovanje je u sastavu Eldis Kusur, Nesib Serhatlić, Mustafa Mehmedović, Mirza Mešić i Senad Šehić. Čestitam predsjedniku i zamjeniku kao i članovima Komisije za izbor i imenovanje. Prije nego krenemo na izjašnjenje prijedloga za rukovodstvo Općinskog vijeća trebamo se izjasniti da li će glasanje biti javno ili tajno. Radi novih vijećnika a i ovih koji su ranije bili u Vijeću, podsjećam da je shodno članu 25. stav 3. Statuta Općine Maglaj kandidata za izbor predsjedavajućeg Općinskog vijeća može predložiti Komisija za izbor i imenovanje, uz prethodno izvršene konsultacije parlamentarnih stranaka zastupljenih u Vijeću, kao i svaki vijećnik ili grupa vijećnika. Članom 25. stav 4. Statuta Općine Maglaj, vijeće između izabranih vijećnika bira u pravilu tajnim glasanjem predsjedavajućeg Vijeća u skladu sa zakonom i poslovníkom Vijeća. Članom 18. stav 1. Poslovníka o radu Općinskog vijeća Maglaj, izbor predsjedavajućeg i zamjenika predsjedavajućeg Općinskog vijeća vrši se u pravilu tajnim glasanjem u skladu sa Statutom i Poslovníkom.

Takođe, stavom 2. člana 18. Poslovníka o radu Općinskog vijeća Maglaj, Općinsko vijeće može odlučiti da se izbor predsjedavajućeg i zamjenika predsjedavajućeg Općinskog vijeća vrši javnim glasanjem. Obzirom na navedene odredbe evo ja ću dati na glasanje da se Vijeće odluči kako ćemo vršiti glasanje za predsjedavajućeg i zamjenika predsjedavajućeg. Da li će biti tajno ili javno. Dajem na glasanje prvo da li želite da se glasanje vrši javno, ko je za?

Glasalo za: Adis Abudrahmanović, Eldin Perhat, Maida Burajić, Eldis Kusur, Armina Mustabašić, Elmedin Ramić, Amer Musić, Alen Ridžal, Eldin Salatović (SDA), Aida Bašić (SNAGA NARODA), Nesib Serhatlić (PDA), Aida Hadžić, Mirza Mešić (DF, Mustafa Mehmedović (BH ZELENI), Kenan Burić (NAPRIJED).

Glasalo protiv: Nema.

Uzdržanih: Firuz Galijašević, Senad Šehić, Damir Bašić, Jasmin Đuhera, Selver Mahmić, Arif Mujkanović, Adin Obralić, Eldin Mehinagić, Samir Fetić, Almin Smailović (SDP).

Konstatujem da smo sa 15 glasova za odlučili se za javno glasanje kada je u pitanju izbor predsjedavajućeg i zamjenika predsjedavajućeg. Pozivam predstavnike političkih stranaka da iznesu prijedloge za predsjedavajuću Općinskog Vijeća i zamjenika predsjedavajuće Općinskog vijeća koji ćemo uputiti Komisiji za izbor i imenovanje da utvrdi kandidate i predloži predsjedavajućeg i zamjenika predsjedavajuće Općinskog vijeća Maglaj. Otvaram raspravu. Gospodin Nesib Serhatlić se javio za riječ, izvolite Nesibe.

Vijećnik Nesib Serhatlić: Poštovana predsjedavajuća, poštovani načelnice, cijenjeni i poštovani vijećnici, direktori javnih preduzeća, mediji i gosti. Sve vas srdačno selamim i pozdravljam. Ja ću kao najstariji vijećnik da iskoristim priliku evo da vas nakon 20 godina kako sam bio u ovim klupama. Ponovo sam se vratio, želim da u ime Pokreta demokratske akcije i u svoje lično ime čestitam svim novoizabranim vijećnicima, zatim čestitam gospodinu načelniku mandat i želim svima nama uspješan rad u budućem periodu. Evo ja ću u ime novoformirane većine iznijeti prijedlog, odnosno prijedloge u paketu za izbor predsjedavajuće Općinskog vijeća i zamjenika predsjedavajućeg Općinskog vijeća. Mi predlažemo za mjesto predsjedavajuće Općinskog vijeća gospođu Aidu Bašić a za zamjenika predsjedavajućeg gospođu Aidu Hadžić. Hvala.

Predsjedavajuća Aida Bašić: Hvala Nesibe. Gospodin Šehić se javio za riječ, izvolite.

Vijećnik Senad Šehić: Sve vas srdačno pozdravljam. Također iskoristio bih na samom početku priliku da novoizabranom načelniku gospodinu Maidu Suljakoviću poželim sretan i uspješan rad u narednom mandatu. Naravno kao i svim izabranim vijećnicima i vijećnicima u narednom četverogodišnjem mandatu kada je u pitanju rad Općinskog vijeća. Ja ću iskoristiti priliku da u ime Kluba SDP-a za predsjedavajućeg Općinskog vijeća predložim člana, našeg vijećnika Firuza Galijaševića.

Predsjedavajuća Aida Bašić: Hvala lijepo Senade. Da li ima još prijedloga? Nema. Nakon što smo čuli prijedloge za predsjedavajućeg i zamjenika predsjedavajućeg Općinskog vijeća Maglaj, sada pozivam Komisiju za izbor i imenovanje da se povuče i utvrdi prijedloge. Kratka pauza dok Komisija ne obavi svoj posao. Možemo nastaviti dalje. Nakon što je Komisija utvrdila prijedloge i zauzela stav pozivam predsjednika Komisije, gospodina Eldisa Kusura da nam se obrati.

Vijećnik Eldis Kusur: Sve vas srdačno selamim i pozdravljam. Odmah na početku da i ja iskoristim kao općinski vijećnik da prvo zahvalim Općinskom vijeću što me izabralo za predsjednika Komisije za izbor i imenovanje. Čestitam Općinskom načelniku Maidu Suljakoviću na izboru za načelnika. Želim mu uspješan rad u narednom periodu. Također svim kolegama vijećnicima, čestitam na izboru i želim vam zaista dobar rad u narednom periodu. Komisija za izbor i imenovanje je održala prvu svoju redovnu sjednicu kako nalažu Statut i Poslovnik o radu Općinskog vijeća. Komisija predlaže za predsjedavajuću gospođu Aidu Bašić a za zamjenika predsjedavajuće predlaže gospođu Aidu Hadžić i komisija predlaže da se za prijedloge o predsjedavajućem i zamjeniku glasa pojedinačno.

Predsjedavajuća Aida Bašić: Hvala Eldise. Gospodin Šehić izvolite.

Vijećnik Senad Šehić: Ja sam samo kao član Komisije tražio da se poštuje Statut Općine Maglaj i to u dijelu, odnosno članu 25. koji kaže Općinski načelnik i predsjedavajuću Vijeća ne mogu biti iz reda istog konstitutivnog naroda, odnosno iz reda ostalih na način utvrđen Ustavom i zakonom.

Predsjedavajuća Aida Bašić: Hvala gospodine Šehić. Gospodin Kusur izvolite.

Vijećnik Eldis Kusur: Mi smo na komisiji raspravljali o prijedlogu kolege Šehića i moram vas upoznati da Ustavom Federacije glava VI Općinske vlasti, član 3. stav 5. i Ustavom ZDK u članu 82a decidno piše sljedeće, moram vam pročitati radi javnosti i da javnost zna da ovo što je Komisija za izbor i imenovanje predložila da nije ništa sporno shodno Ustavu, kaže član 82 a:

Općinski načelnik i predsjedavajući Općinskog vijeća u Općinama ili Općinskim vijećima višenacionalnog sastava ne mogu biti iz reda istog konstitutivnog naroda, odnosno iz reda ostalih, izuzev u onim općinama u kojima jedan od konstitutivnih naroda čini više od 80 % stanovništva prema posljednjem popisu stanovništva u Bosni i Hercegovini. Posljedni popis stanovništva bio je 2013. godine, Bošnjaka u Maglaju ima 85,6 % tako da smo mi u potpunosti ispoštovali svu proceduru i nismo prekršili zakon, to jeste Ustav ni federalni, ni kantonalni. Tako da je prijedlog Komisije za izbor i imenovanje u skladu sa Ustavom. Eto.

Predsjedavajuća Aida Bašić: Hvala gospodine Kusur. Gospodin Firuz izvolite.

Vijećnik Firuz Galijašević: Ja se ipak moram pozvati na Statut Općine Maglaj koji je zadnji put usklađen 2008. godine, znači po aktuelnom Statutu Općine Maglaj se krše prava nacionalnih manjina i zbog toga ukoliko prekršite pravo mi ćemo podnijeti Apelaciju Ustavnom sudu zbog kršenja Statuta Općine Maglaj.

Predsjedavajuća Aida Bašić: Hvala gospodine Firuze. Gospodin Kusur izvolite.

Vijećnik Eldis Kusur: Shodno važećim pravnim normama Ustav je najviši akt jedne zajednice, tako da sve što se donosi drugim zakonima ili nekim podzakonskim aktima kao što je Statut, Ustav isključuje. Ustav je stariji, vi imate pravo da uradite šta mislite da treba a Ustav je iznad svih zakona i dole nabrojanih podzakonskih akata.

Predsjedavajuća Aida Bašić: Hvala gospodine Kusur. Gospodin Šehić, izvolite.

Vijećnik Senad Šehić: Dakle pravni vakum u Federaciji Bosni i Hercegovini već dugo datira a odnosi se na to da se izbori provode po popisu iz 2013. godine, što je suprotno Ustavu koji još uvijek definiše popis iz 1991. godine. Naime, u Ustavu FBiH se u poglavlju 9. članu 7. stavu 1. navodi da se popis iz 1991. godine uzima ko posljedni popis stanovništva kod svih izračunavanja osim za izbor delegata u Domu naroda.

Predsjedavajuća Aida Bašić: Hvala gospodin Šehić. Da li se još neko javlja za diskusiju? Ukoliko nema više diskutanata, referisati ću se vezano za diskusiju koju ste vodili. Ja sam predsjedavajuća Općinskog vijeća punu godinu dana, također i u proteklom mandatu Općinski načelnik je bio Bošnjak, tako se izjašnjavao. Ja se izjašnjavam kao Bošnjak. Napomenut ću vas da OSCE prati rad Općinskog vijeća, tako da sve da je nešto bilo sporno proteklu godinu to bi sigurno se do današnjeg dana znalo. Vijećnici koji sjede u klupama, koji diskutuju jasno znaju da su prošli put digli ruke kada sam ja bila prijedlog za predsjedavajuću. Hvala lijepo. Gospodin Firuz izvolite.

Vijećnik Firuz Galijašević: Samo da vas napomenem da u prethodna dva mandata bivšeg načelnika Mirsada Mahmutagića predsjedavajuća Općinskog vijeća je bila Svjetlana Zamboni, Hrvat. Znači, mi smo ispoštovali Statut Općine i Ustav, bila je Hrvat. Onog trenutka kada je tadašnja većina smijenila Svjetlanu Zamboni sa mjesta predsjedavajuće, bilo je nudeno Peri Mamiću jedinom nebošnjaku u prošlom sazivu Vijeća i on je to odbio. Tako da mi nismo imali razloga da bilo šta pominjemo kada je u pitanju kršenje Statuta i Ustava. Hvala.

Predsjedavajuća Aida Bašić: Hvala Firuze. Da li ima još diskutanata? Ukoliko nema nastaviti ćemo dalje sa radom. Sada ću staviti na glasanje kako...na zahtjev Kluba SDP-a pauza od 5 minuta izvolite. Nastavljamo dalje, da li Klub SDP-a želi iznijeti neki stav, ne. Ukoliko nema, zatvaram raspravu te stavljam na glasanje pristigle prijedloge. Prvo ćemo, obzirom da je i prijedlog Komisije da se glasa pojedinačno. Prvo ćemo se izjasniti vezano za izbor predsjedavajućeg Općinskog vijeća Maglaj. Imali smo dva prijedloga. Jedan prijedlog je koalicione većine a to je Aida Bašić kao i Komisije za izbor i imenovanje koja je potvrdila taj prijedlog a drugi prijedlog dolazi od strane Kluba SDP-a to je gospodin Firuz Galijašević. Prvo ću staviti prijedloge, stavljam na glasanje prijedloge kako su i pristigli i stavljam na glasanje prijedlog za predsjedavajuću Općinskog vijeća Aida Bašić, ko je za?

Glasalo za: Adis Abudrahmanović, Eldin Perhat, Maida Burajić, Eldis Kusur, Armina Mustabašić, Elmedin Ramić, Amer Musić, Alen Ridžal, Eldin Salatović (SDA), Aida Bašić (SNAGA NARODA), Nesib Serhatlić (PDA), Aida Hadžić, Mirza Mešić (DF, Mustafa Mehmedović (BH ZELENI).

Glasalo protiv: Firuz Galijašević, Senad Šehić, Damir Bašić, Jasmin Duhera, Selver Mahmić, Arif Mujkanović, Adin Obralić, Eldin Mehiniagić, Samir Fetić, Almin Smailović (SDP).

Uzdržanih: Kenan Burić (NAPRIJED).

Predsjedavajuća Aida Bašić: Konstatujem da je prijedlog za predsjedavajuću Općinskog vijeća Maglaj gospođa Aida Bašić dobila 14 za, 10 protiv i 1 suzdržan. Radi transparentnosti samog postupka ja ću staviti i prijedlog gospodina Firuza. Nema potrebe, ne želite. Uredu. Hvala lijepo. Hvala vijećnicima koji su glasali za mene, te konstatujem da je sa 14 glasova za Aida Bašić predsjedavajuća Općinskog vijeća Maglaj, izabrana za predsjedavajuću Općinskog vijeća Maglaj u mandatu 2024-2028. Prelazimo na glasanje za zamjenika predsjedavajućeg, prijedlog koalicione većine je bio gospođa Hadžić Aida i taj prijedlog je potvrdila i Komisija za izbor i imenovanje. Više prijedloga nije ni bilo, znači imamo samo jedan prijedlog i evo ja stavljam na glasanje. Ko je za da gospođa Hadžić bude zamjenica predsjedavajuće Općinskog vijeća Maglaj, ko je za?

Glasalo za: Adis Abudrahmanović, Eldin Perhat, Maida Burajić, Eldis Kusur, Armina Mustabašić, Elmedin Ramić, Amer Musić, Alen Ridžal, Eldin Salatović (SDA), Aida Bašić (SNAGA NARODA), Nesib Serhatlić (PDA), Aida Hadžić, Mirza Mešić (DF, Mustafa Mehmedović (BH ZELEN), Kenan Burić (NAPRIJED).

Glasalo protiv: Firuz Galijašević, Senad Šehić, Damir Bašić, Jasmin Đuhera, Selver Mahmić, Arif Mujkanović, Adin Obralić, Eldin Mehinagić, Samir Fetić, Almin Smailović (SDP).

Uzdržanih: Nema.

Predsjedavajuća Aida Bašić: 15 za, protiv 10, uzdržanih nema. Konstatujem da je gospođa Hadžić Aida izabrana za zamjenika predsjedavajućeg Općinskog vijeća Maglaj sa 15 glasova za. Ja gospođu Hadžić pozivam da mi se pridruži i čestitam joj na imenovanju. Završili smo sa ovim oficijelnim dijelom. Napominjem, ukoliko nisu do sada formirani Klubovi vijećnika, zamolila bih vas da to učinite što prije i u Općinsko vijeće dostavite nazive svojih Klubova te odredite predsjednika i zamjenika unutar Kluba, kako bi Općinsko vijeće moglo da sazove Kolegij za prvu sjednicu Općinskog vijeća Maglaj. Nakon ovog oficijelnog dijela ide dio koji se odnosi na obraćanje Općinskog načelnika, zatim predsjedavajuće Općinskog vijeća a nakon toga zamjenica predsjedavajuće Općinskog vijeća Maglaj. Ja pozivam Općinskog načelnika da nam se obrati.

Maid Suljaković, Općinski načelnik: Poštovana predsjedavajuća Bašić, zamjenice predsjedavajuće gospođu Hadžić, poštovane vijećnice i vijećnici, pomoćnici Općinskog načelnika, uvaženi direktori javnih ustanova i javnih preduzeća, predstavnici udruženja boračkih i drugih koji su prisutni s nama, dragi saradnici iz Službe Općinskog načelnika, iskoristio bih priliku da vas sve poselamim i pozdravim. Također iskoristio bih priliku da čestitam vijećnicima na izboru za vijećnički mandat 2024-2028. godinu. Čestitao bih vam na tome što ste osvojili povjerenje naših sugrađana, nadam se da ćemo zajedno to povjerenje da opravdamo i da ćemo u narednih 4 godine kvalitetno surađivati i na dobrobit svih onih koji su nas ovdje i birali. Također, iskoristio bih priliku da pozovem sve vijećnike u narednom periodu koji smatraju da na temelju našeg zajedničkog razgovora možemo doprinjeti kvalitetnijem životu naših građana, moja vrata su otvorena za sve i stranke i za sve vijećnike u Općinskom vijeću. Siguran sam da ćemo kvalitetno surađivati. Hvala vam.

Predsjedavajuća Aida Bašić: Hvala načelniče. Evo još jednom sve vas selamim i pozdravljam. Na samom početku želim da čestitam Općinskom načelniku na novoj funkciji i ja mu želim puno sreće u daljem radu, u što uopće ne sumnjam. Također čestitam svim izabranim vijećnicima i naravno želim da što bolje obavljaju svoje vijećničke funkcije. Pozdravljam sve naše goste, direktore, zastupnike. Hvala vam što ste se odazvali na ovu istovremeno i svečanu sjednicu Općinskog vijeća i odvojili svoje vrijeme. Hvala koalicionim partnerima koji su me predložili za predsjedavajuću Općinskog vijeća na čelu sa SDA strankom, koja je ovim postupkom pokazala da želi da vodi jednu transparentnu i sigurno drugačiju politiku jer dopustiti da rukovodstvo bude iz drugih koalicionih stranaka je zaista velika stvar. Ja se nešto u zadnjih 8 godina ne mogu sjetiti da je to neko drugi uradio. Hvala i vijećnicima koji nisu glasali za mene. To je zaista vaše pravo i imate i druge korake naravno koje možete poduzeti. Čestitam svojoj kolegici gospođi Hadžić također na izboru za moju zamjenicu. Što se tiče samog Vijeća, obzirom da ja imam iskustvo i kao

dopredsjedavajuća i kao predsjedavajuća, ja vjerujem da ću sigurno se potruditi da to obavljam još profesionalnije i još bolje i još uspješnije. Funkcionisanje samog Vijeća neće ovisiti o rukovodstvu samo Vijeća, nego i od svih vas ostalih vijećnika a obzirom da imamo puno novih lica, ne sumnjam da ćete se potruditi da svi zajedno doprinesemo razvoju i boljitku naše općine Maglaj i njenih građana. Hvala lijepo.


Dopredsjedavajuća Aida Hadžić: Da pozdravim i ja sve prisutne, da čestitam načelniku na izboru i svima nama općinskim vijećnicima izbor u ovom četverogodišnjem mandatu. Zahvaljujem se u svoje ime i ispred Općinske organizacije Demoraktske fronte na izboru dopredsjedavajuće Općinskog vijeća. Trudit ćemo se znači da radimo najbolje ono što možemo, naravno poštujući zakon i da nam poželim svima puno uspjeha, sreće i naravno sve zavisi od našeg truda i naše volje kako ćemo raditi u naredne četiri godine. Hvala.

Predsjedavajuća Aida Bašić: Hvala gospodo Hadžić. Evo obzirom da smo Dnevni red iscrpili, odradili imenovanje Komisije, odradili imenovanje rukovodstva Općinskog vijeća. Položili ste zakletvu, ja vam još jednom čestitam i zaključujem ovu sjednicu, konstituirajuću sjednicu Općinskog vijeća Maglaj. Hvala vam lijepo.

Sjednica završena u 10,05 sati.

Zapisničar

Elza Gračić Skejić



PREDSJEDAVAJUĆA

Aida Bašić

